

# INUIT ATAQATIGIIT

## Inatsisartuni



18. juni 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara.

### **Naalakkersuisunut apeqquut:**

- 1. Mittarfinnik sanaartornissaq pillugu danskit naalagaaffiata aningaasaleeqataanissaa pillugu danskit Naalakkersuisuinik oqaloqatiginninnerit siulliit qanga pisimappat?**
- 2. Mittarfinnik pingasunik sanaartortoqassappat aningaasat attartukkat erniaasa %-iat qanoq annertutigissava?**
- 3. Kikkut aningaasanik attartorfigineqarnissaat naalakkersuisuniit aalajangiunneqareerpa?**
- 4. Danskit imaluunniit Kina-miut nunaluunniit alla aningaasaliisussatut piukkunnarnerusutut Naalakkersuisuniit nalilersuinermi sorleq piukkunneqarnerua? Aamma sooq piukkunneqarnerua?**
- 5. Raajat qalerallillu akiisa 40%-imik appariassagaluarpata nunatta karsianut qanoq sunniuteqassava?**
- 6. Aalisarnermut inatsisissaq siunissami aningaasalersugassatsinnut attuumassuteqarmat allannguutissaasa aningaasatigut qanoq siunniuteqarnissaata allannguutisai Naalakkersuisut misissuiffigisimavaat?**
- 7. Mittarfissualiornerit Qaanaami, Uummannami, Upernavimmi, Qasigiannuani, Aasianni, Kangaatsiami, Sisimiuni, Maniitsumi, Paamiuni, Narsami, Nanortalimmi, Tasiilami, Ittoqqortoormiuni aammalu sineriammi illoqarfinni nunaqarfinnilu sutigut iluanaarfiussappat?**
- 8. Qeqqata kommuniani akileraarutitigut isertitat aamma sulisartut qassit Kangerlussuaq matussappat annaasaqaatigineqartussatut naatsorsuutigineqarpat?**
- 9. Nunatsinni tamarmi sulisartut amerlassusaat qanoq allannguuteqassava mittarfiit pioreersut matullugit nutaanik sanaartortoqassappat?**
- 10. Qeqqata kommunia Naalakkersuisuniit sukumiisumik oqaloqatigalugulu pilersarusioqatigineqarpa qulakkeerniarlugu Kangerlussuarmi mittarfiup**

**namminersortunngorsarneqarnissaa aporfissaqanngiivissoq? Paasissutissat pigineqartut suuppat?**

**11. Narsarsuarmi mittarfik matuneqarnissaa pillugu savaateqarfiit Qassiarsummi, Igalikumi taakkualu qanitaani savaatillit allallu namminersortut takornariaqarnermi inerisaasimasut qanoq eqqorneqarnissaat pillugit pineqartut peqataatinneqarlutillu misissuiffigineqarsimappat?**

**12. Kangerlussuup Narsarsuullu mittarfiunerat tunngavigalugu takornariaqarnermik aningaasarsiorumallutik inuussutissarsiutinik aningaasaliisimasorpasuit Naalakkersuinikkut misissuiffigalugillu qanoq eqqorneqarnissaannik suliamik tunngavilersukkamik suliaqartoqarsimava?**

(Inatsisartunut ilaasortaq Aqqaluaq B. Egede, Inuit Ataqatigiit)

**Tunngavilersuut:**

Isumaqarama Inatsisartunut ilaasortat mittarfissualiortoqarniarnera pillugu inuiaqatigiinnut kingunissaat pillugit paasissutissanik naammattunik pissarsisimangitsut apeqquteqaatinik pingaarsorisannik suliaqarpunga. Aalajangigassamut annertuumut aningaasarpasuarunik naleqartussamut aamma inuiaqatigiinnut kinguneqaatissai sapinngisamik annertunerpaamik ilisimasaqarfiginissaat pingaaruteqaqaaq.

Inatsisartuni paasissutissat naammattut piginngilagut. Inuiaqatigiit sumiiffinni ataasiakkaani sunnerneqarnissaat, aamma inuussutissarsiuteqartut namminersortut takornariaqarnermillu inuussutissarsiuteqartut mittarfiit pioreersut qanitaanni attuumassuteqarlutik aningaasarsiorpassuit misissuinermi minitaasimasutut misinnarpoq. Taamaammat Naalakkersuisut erseqqilluinnartumik akissuteqartarnissaat kissaatigaara. Suliassaq inuiaqatigiinnut attuilluinnartussaq peqqissaarussamik tunngavilersorluakkamillu suliarineqassappat aamma Naalakkersuisut apeqquterpassuarnut erseqqissumik akisinnaasariaqarmata.

Kissaatigaara apeqqutit ullut suliffiusut qulit qaangiutsinnagit akineqarnissaat.